

**Monday, April 13, 2026**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**HOME VOTING**

Tukin dar 7:00atang khan Aizawl Municipal Corporation-AMC inthlan atana kum upa te, damlo natna khirh bik nei polling station pan theilo te leh pianphung a rualbanlo polling station pan theilo te tana a vote thlak theihna tura ruahman, Home Voting chu kalpui tan a ni a. Home Voting hi ningani thleng kalpui tura ruahman a ni.

Home Voting ni hmasa ber tukin dar 6:00 khan District Election Officer's Office, Aizawl atang in vote thlakna tur EVM leh hmanraw dangte Municipal Ward tin te Municipal Returning Officers (MROs) ten General Observer hriatpuina in Strong Room atangin an pechhuak a.

Home Voting hi AMC Ward 19-ah kalpui vek tur a ni a, Ward tinah Home Voting Team pakhat theuh awm in, Home Voting ti tura dilna lut zat hi 2769 a ni a, ni 4 chhung a vote thlak hi zawh hman tura ruahman a ni, Municipal Ward – 2 ah dilna hi lut tamber in diltu mi 209 an awm a ni.

Tukin a Home Voting Team tirchhuhuaah hian General Observer te, DEO aiawh Election Officer te, Ward tin MRO leh AMRO te, Home Voting Nodal Officer te, EVM Nodal Officer te, Information & Publicity Nodal Officer te leh Political Party aiawh te an tel a ni.

Hriat theih chinah vawiin Home Voting a, Vote thlak upa ber chu Pi Nghakliani, Kum 102, Dawrpui veng, Ward-IX hnuai a mi a ni.



**MPCC PRESS CONF**

Congress Pary chuan Mizorama buhfai supply tu thahnem tak zingah sorkarin buhfai supply tura a thlan LZ Juice chu sum siamna atana a bika ruahman lawk sa niin a lang an ti.

Mizoram Pradesh Congress Committee Vigilance Cell vice chairman Pu R Vanlalvena chuan vawiin khan Aizawl Press Club-ah thuthar thehdarhtute kawmin, ZPM sorkar hnuai buhfai supply tura thlan LZ Juice in Mizoram mipui tana buhfai a supply danah thil dik lo tam tak a awm a; hemi chungchangah hian Lok Ayukta-ah a rangthei ang berin complain thehluh an tum tih a sawi a ni.

ZPM sorkarin buhfai Grade 'A' supply tura a thlan LZ Juice chuan buhfai supply tur an leina Suhana Enterprise, Assam hnen atangin Grade 'A' buhfai ni loin, buhfai man tlawm (common rice) Grade 'C' ngei an lei tih an finfiah thu sawiin, hei hi mipuite zah lohna lian tak a ni, a ti a. Buhfai supply-na challan leh lirthei in mil lo engemaw zat a awm thu sawiin Pu R. Vanlalvena chuan, challan a motor number inziak, mahse, chhui chian hnuai motor registration record awm lo buhfai phur motot tam tak hmuh chhuah a nih thu a sawi bawk a, heng motor an chhui te hi auto rickshaw, jcb, bike, car leh leh motor te dang te an ni a ti.

MPCC Vigilance Committe hruaitute chuan, Zuangtui Muanna Godown a buhfai phurhluh dan an enfiahnaah, thawktute chuan lirthei lut reng reng uluk taka endik anih thu leh buhfai te pawh buk nawn vek anih thu an sawi si avangin, LZ Juice te hian thuneitu sang duhsakna an dawng bik anih loh chuan Godown a buhfai an phurhluh dan chu thawktuten an lo pawm theih dan a awm lo an ti a ni.



## **MNF PRESS CONF**

AMC inthlanpui neih tura Ward No. 5, 14 leh 18-a MNF candidate 3 chuan wawiin khan Aizawl Press Club-ah thuthar thehdarhtute an kawm a; MNF in AMC ah sorkarna an siam chhunzawm a nih chuan awlsam zawka chhiah (property tax) pek dan tur ruahman a nih dawn thu leh Aizawl khawpui zauh dan kawng an zawn dawn thu an sawi.

AMC Ward. No. 14 MNF candidate Pu Hmingthansanga chuan, AMC-a MNF in sorkarna an siam leh chuan Property Tax khawna tur zirchianna neih thar leh a ni ang a, khai rual taka tax hi khawn a ni ang a, chawi tur zat dik tak chawi tura hmalak a nih dawn thu a sawi.

State sorkar nen tangkawpin chhiah pek dan awlsam zawk siam tura hmalak a nih dawn thu te, in sak phalna leh lei laih phalna mumal zawk leh rang zawka pek chhuah a nih theih nan hmalak a nih dawn thute Pu Hmingthansanga chuan a sawi bawk.

((BYTE - Pu Hmingthansanga))

AMC inthlanpuia MNF candidate 3 - Pu Hmingthansanga bakah Ward No. 18 candidate Pu Lalrina Renthlei leh Ward. No. 5 candidate Abishag Vantluangpuii Ralte te chuan, in/building hlui thiah phalna rang zawka pek chhuah te, leivung paihna hmun siam belhte, mi harsate tan leh vantlang hmunhmaa tui dahkhawlina siam te, mi harsa zawkte tana inhlawhna siamte, theatre/auditorium changtlung siam te, youth park/ eco-park siam te, vantlang hmun/park-a open Gym siam te, kum upate hamthatna leh awlsamna tur ngaihtuah te, Bawngkawna AMC Sport Complex tihchangtlun te, pedestrian Flyover leh Footpath tam zawk siamte, internal road siam belh te, vehicle parking two-wheeler/taxi parking area bakah mimal lirthei park-na tur 'Smart Car Parking' tam zawk siam tura hmalak te, thlanmual intawm siam tura hmalak mekna chhunzawm leh, vantlang hmuna free wifi tha zawk dahte chu sorkarna an siam chuan Aizawl khawpui tana hma an lakna turte a nih thu an sawi.

